

欽定剿平粵匪方略

欽定勦平粵匪方略卷四十一 癸丑年

五月十八日 壬戌 江甯將軍托明阿貴州提督善

祿奏言五月十二日 臣等馳抵歸德聞得本月

初七日賊匪攻陷歸德府城撫 臣陸應穀帶兵

於歸德城外與賊接仗未能獲勝賊現奔竄汴

梁 臣等當卽督兵趕往進剿並飛咨勝保奕經

等遵照前

旨迅卽督兵前進互相聲援仍應請

旨飭下山東陝西直隸各督撫迅速撥兵扼要堵截現  
在叅將樂桂在歸德收復潰兵請卽留在歸德  
駐守並添派遊擊常有撥兵協同防守再遊擊  
成明於五月初九日帶兵九百名趕至歸德大  
股賊匪已去因有土匪在城搶掠已經該遊擊  
帶兵勦除並安撫逃回難民請將該員及所帶

弁兵隨同臣等進剿逆匪以遏兇鋒奏入

上諭曰應如何進剿截留隨時斟酌辦理河南諸軍既統歸托明阿調遣責有攸歸無可推諉汴省緊急萬分以速速援救爲要

同日工部尙書許乃普奏言軍興以來屢奉

諭旨令官兵實力防堵紳民所在團練乃無事時則言防而有事卽逃並不能堵無事時則言練而有

事卽散並不能團甚至黑龍江勁旅亦以帶兵  
不得其人聞風先潰遺棄軍裝該逆遂由滁州  
鳳陽蒙城竄擾歸德總因浦口堵剿不力任其  
蔓延所致此次竄入豫省之賊想江北重兵必  
已趕赴堯剿惟又成尾追之勢而歸德以北兵  
力尙單必須精兵迎頭截擊方足以壯士氣而  
殄賊鋒咸豐二年十二月蒙古王等年班來京

呈請自備資斧前往軍營勦賊奉

旨暫行毋庸前往聽候調遣現當北路亟籌防勦之時  
似可照所請辦理俾得及時自效將來功成事  
定懋賞優加所有該王等自辦軍裝經費儘可  
分年給還再河北彰德衛輝懷慶三府士民素  
稱義勇儻有能自備糧餉獨成一隊殺賊立功  
者應請援照福建海澄公之例子以五等之爵

卽日刊刻謄黃徧行曉諭則河北豪傑之士必有應

詔而起者緣賊氛一日不平人心一日不定不爲我用難保其不爲賊誘

國家懸以爵賞待以誠信順逆邪正自不待智者而決矣

同日刑部左侍郎羅惇衍通政使司參議梁同

新左庶子馮譽驥給事中張祥晉奏言邇來賊蹤靡定擾及河南伏乞

皇上明降諭旨將現在情形廣行曉諭俾知賊距京師尙遠凡所布置皆係思患豫防且可令逆匪震驚聞風遠遁則人心自定而賊膽必寒矣茲謹擬守禦之法四條恭呈

御覽一京師城外宜先紮營盤以資防衛也查守城之



要必於各城門外扼要立營互爲犄角其餘路  
徑皆用濠溝挖斷並築土牆以資捍衛復將靠  
城屋宇全行拆毀庶賊無薄城之患至距京較  
近之德州雄縣良鄉固安各州縣並蘆溝橋永  
定河各要隘皆當遴派官兵鎮守以聯聲勢一  
京師城內宜聯絡官民以察奸細也查京師旗  
人皆住內城各直省商民多住南城應各分地

段編排保甲五家聯保其稽查之法則令滿漢科道八十員專司其事如有別項差使者令

記名御史人員及兵刑二部郎中員外郎充補將內城

南城各分爲四十段滿科道稽查內城漢科道稽查南城將鋪戶居民倣五百家爲黨之制擇舉黨正分董之每黨設長班一人更夫柵夫四人以資差遣其經費皆取給於五百家之中每

集賢堂  
三  
街皆設柵欄以時啟閉奸細自無從匿跡至官  
民聯絡之法內城則分旗分南城則分省分每  
旗每省中請

欽派大員一二人爲倡令其各相聯絡議定章程有警  
則按所分地段酌出人數幫護城垣庶官民一  
氣相孚矣一京師糧餉當權宜籌備以濟急需  
也查戶部庫銀現存無多各倉糧米亦復不足

目前濟急均應參以權宜凡各省年例撥解款項應請概行解京以應軍需其各省應用之款皆令各督撫設法暫籌以先所急而後所緩至京通各倉多有設立城外者如有多存米石或先行支放或運赴城內各倉以備要需庶食用兼足可無匱乏之虞矣一京師防禦宜量調外兵以壯聲援也查金陵揚州兩路兵力最厚得

力將弁亦多雖該處防剿尙爲喫緊然探聞揚  
州賊勢漸衰似可分兵北來接應至金陵營中  
各兵弁前在粵楚有年賊情較熟儻能酌選精  
兵迅速北上似爲得力若兵力難分或擇諳練  
營務之鎮將數員星馳到京以資調遣於防禦  
不無裨益以上四條皆屬目前急務伏乞

皇上聖明洞鑒立予施行以安畿輔而固人心均奏入

上諭內閣曰現在逆匪分股竄擾河南地方已派大兵  
前往剿辦並命直隸山東各督撫及統兵大員專辦  
防剿近畿一帶大兵雲集亦可源源接應因思京師  
爲根本重地防範稽查尤關緊要著派御前大臣科  
爾沁郡王僧格林沁步軍統領左都御史花沙納右  
翼總兵達洪阿軍機大臣內閣學士穆蔭專辦京城  
各旗營巡防事宜

上又諭內閣曰賽尙阿著留京隨同僧格林沁等辦理  
巡防事宜

上又諭內閣曰逆匪負固金陵揚鎮分竄皖豫疊陷城  
池狡譎兇殘神人共憤方其初竄浦口不過一二千  
人經吉林官兵於六合地方奮擊痛殲不下數百其  
長髮真賊自臨淮西奔者爲數實已無幾乃沿途裹  
脅擄掠資財焚燒廬舍滁鳳蒙亳之間被其蹂躪實

惻朕懷現在各路大兵分道攻勦惟恐該逆鋌而走  
險飄忽靡常所過地方居民人等或因猝不及防紛  
紛遷徙轉遭荼毒是避害而適以罹害何如自相保  
衛奮勉圖功乎本年正月特降諭旨令各省倣行嘉  
慶年閒堅壁清野之法旋諭中外大員各舉所知襄  
辦團練諒已次第舉行我朝

列祖



列宗深仁厚澤淪浹民心凡食毛踐土之倫莫不尊親  
共戴當此逆氛未靖必有忠義勇敢之士奮跡草茅  
建奇功而膺懋賞者如從前楊遇春楊芳等均起自  
鄉里致爵通侯比年廣西湖南等省紳民團練勦賊  
無不立予恩施卽如幫辦軍務之湖北臬司江忠源  
亦以居鄉團練屢著勞績超擢監司可見練勇之中  
人材輩出凡爾士民同茲觀感至北地民風素稱驍

勇安徽河南山東江南交界地方不乏奇傑之材能  
爲民禦災捍患其有自備資斧募勇投效軍營殺賊  
立功者統兵大臣卽覈明該士民募勇名數立卽奏  
請優獎或給官職或給翎枝勇號以爲急公嚮義者  
勸其在本籍團練保衛鄉閭一遇賊匪竄至卽行合  
力殲擒則捍禦之功亦與效力行閒同其賞賚地方  
官吏仍不得擅行徵調致令遷地弗良如此實力奉

行以兵衛民卽使民自衛俾賊進無所掠退無所踞  
散其黨與殲厥渠魁烏合之寇不足平也至從前被  
脅之徒或以驕橫結怨鄰黨或以桀驁誤蹈刑章若  
能勦賊自效卽可立荷恩施如張國樑之洊擢都司  
張鳳山等之賞給頂戴明徵具在卽或先被賊誘自  
拔來歸但能改過自新亦可同邀寬典此朕仰體  
上天好生之德除惡安良之意各該大臣將軍督撫等

著卽刊刻謄黃徧行曉諭咸使聞知

臣等謹案夏書有言曰殲厥渠魁脅從罔治  
蓋戮渠魁以奪姦宄之氣赦脅從以安反側  
之心誠有合於恩威並用之義也粵逆以小  
醜跳梁初不過一二狂悖之徒藉端煽亂及  
至沿途裹脅兇燄日張所過城池橫遭蹂躪  
愚民無知動作避地之計而卒未能免於難

我

文宗顯皇帝念切痼瘵不忍斯民流離失所

特諭直省舉行團練並堅壁清野之法兵與民聯絡一

氣固足使窮寇進無所踞退無所掠矣近又

廣布綸言

招選茂異凡才備干城之選者但能殺敵致果靡不

優加超擢卽或被賊脅從誤罹法網苟能自拔來歸亦

必

恩施逾格予以自新旣荷

皇仁浩蕩復欽

聖武昭垂彼罪惡貫盈之輩固將聚而殲旃而投誠悔  
罪之儔及安居樂業之衆亦孰不涵濡

閭澤共戴

堯天也哉

上又諭內閣曰自逆匪竄踞金陵揚州鎮江以來疊經降旨令琦善向榮迅速督兵克復並嚴防逆賊分竄之路乃該大臣等各擁重兵未能收復一城以致另股賊匪由安徽竄至河南重煩徵調琦善向榮均係獲罪之員經朕棄瑕錄用若再不知感懼剋期收復三城坐使賊勢蔓延勞師糜餉國法具在該大臣等其各懷之

上又諭內閣曰自逆匪竄擾粵楚以來所過州縣地方  
動輒失陷卽省會郡城如安慶九江等處亦未聞有  
摧遏兇鋒嬰城固守者推原其故總由地方各官先  
存一倖生畏死之心遂將土地人民委之不顧實堪  
痛恨前經降旨諭令統兵大臣及守土大吏將失守  
城池各員查辦乃或稱下鄉募勇或稱遇救得生曲  
爲隱飾且有久未查明入奏者似此遇賊逃避之員



若不嚴行懲辦何以肅國紀而儆將來著各該督撫大吏凡有失守地方未經覆奏各員迅卽查明按律定擬具奏並著該部分別催查儻仍延玩卽將該管上司叅處

十九日  
癸亥 訥爾經額奏言直隸東西兩面均與

山東河南毗連前奉

飭調山西兵三千名來直防堵乃山東撫臣李德又請

調直隸精兵二千名赴東操練誠如

聖諭畿輔重地亟應嚴密布置不能再分兵力臣思交界豫東地面前已增兵防守保衛直隸卽所以壯鄰省聲援現惟嚴飭鎮將等偵探賊蹤所至  
欽遵

諭旨出境協剿不任株守一隅至山東單縣之劉家口係與直隸東明縣接壤現准撫臣李德來咨知

已馳赴劉家口堵禦東明近接長垣自豫省蘭  
儀失守長垣喫重添調各兵防守黃河北岸係  
與東明聲息相通若果劉家口有警自當不分  
畛域移兵攻擊可期應手惟調撥之本省山西  
官兵到齊後前路固已嚴密而後路接應之兵  
必須豫爲防範臣查前奉

飭調之察哈爾馬隊兵四千名現駐張家口外直隸地

勢平衍騎兵馳逐易展其長相應請

旨調撥二千名來直擇要駐紮以備緩急之需奏入

上命軍機大臣傳諭訥爾經額曰現在直隸防堵喫緊  
本省之兵必應移緩就急不可專恃鄰省派兵協防  
前調山西兵三千名恐到直尙須時日該督仍當飛  
催本省各營已調之兵趕緊前進並就近添調以資  
策應毋稍遲誤直隸全省輿地並與山東河南交界

水陸要隘處所何處駐兵若干名何人管帶著卽詳細繪圖貼說具奏

上又命軍機大臣傳諭華山泰曰前有旨令華山泰等統帶察哈爾官兵四千名迅速來京聽調並挑贍壯馬五千匹迅解來京著華山泰卽日統帶官兵配齊軍裝器械前來所調馬五千匹並著迅速挑解勿稍遲誤

上又命軍機大臣傳諭奕興景瀄曰現在賊匪由皖竄豫畿輔一帶急應嚴密防堵著奕興飭令協領魁星保塔芬布綽勒霍倫特普欽等於盛京旗營內無論壯丁餘丁挑選步隊精兵四千名派錦州副都統維祿與該協領等統帶並著景瀄於吉林旗營內挑選馬隊精兵二千名派伯都訥副都統倭克精額統帶均各配帶軍裝器械迅速馳赴天津聽候調遣並著

突興挑備大凌河驢壯馬匹二千卽令該吉林官兵  
乘騎啟行毋稍延緩

同日恩華奏言臣前因賊匪於曹河上游撲過  
北岸情形緊急當卽催提後路官兵星馳前進  
一面派人偵探現據探得曹州之賊大半土匪  
已往西南竄去東境情形稍緩臣卽應遵

旨赴豫勦辦惟所帶之吉林黑龍江等處官兵應領火

藥鉛丸鍋帳馬匹等項均由徐州糧臺支領道途迂遠稽延時日現在應用各項擬就近在兗州糧臺支領臣卽由濟甯曹州渡黃馳赴河南旣不至繞越道路而該處土匪並可相機勦洗庶不失兼顧之意至臣統帶之黑龍江官兵二千名現在東省情形旣緩應仍由臣督帶赴豫其托雲保容照所帶之吉林前五起官兵臣行



文令其帶領一併赴豫所有濟甯一帶應由署  
東河總督長臻會商山東撫臣李德另行撥兵  
防堵奏入

上命軍機大臣傳諭恩華瑞昌李德曰前因賊匪出曹  
河上游搶船北渡當有旨令恩華等星速前進昨因  
東省緊要復明降諭旨令恩華瑞昌與李德專辦山  
東防剿事務茲據奏稱曹州之賊大半土匪已向西

南竄去東境情形稍緩該尙書由曹州渡黃馳赴河南自應如此辦理所帶黑龍江官兵二千名著卽督帶迅速前往其托雲保容照所帶之吉林官兵著令其一併赴汴惟河南固宜趕緊赴援河北尤應嚴密防範李德曾否帶兵折回所派曹州鎮兵是否足資防剿瑞昌是否同恩華一路前進抑係分路兜剿總期於進剿時兼顧後路勿令逆匪乘間渡河轉致官

兵落後墮賊奸計所有官兵火藥鍋帳馬匹口糧據稱擬由兗州就近支領自較徐州爲便著卽知照辦理

同日沈兆澐林揚祖奏言臣等因汴省城大兵單招募民勇與官兵一律登陴十三日該匪等往來城東南兩面施放槍礮經臣等督飭兵勇用千餘斤大礮向其開放賊匪紛紛避至離城

數里之繁塔寺屯紮十四日黎明臣等不惜重賞激勵兵勇中敢死之士多人縋城而下攜帶火彈將賊占村屋焚燒莊內餘匪盡行殺斃是日午後又有賊匪從東而來或馳或步不計其數皆離城數里繞道而行內有近城探視之匪經兵勇下城追擊殺斃十餘名生擒十名正法傍晚賊望西南行走在遠村屯集該匪夥黨甚

多近聞已竄赴距城四十五里之朱仙鎮該處  
五方雜處誠恐陸續裹脅勢益猖獗臣等現惟  
督率紳民兵勇固守城垣目前尙可勉力支持  
所慮者匪勢日增我兵寡不敵衆汴省係畿輔  
門戶城西二十五里黑岡地方緊臨大河萬一  
賊匪盜決有不堪設想者伏懇

皇上迅賜催調直隸山東等處官兵及臨洺關防守官

兵就近星夜馳赴汴城救援並調提臣善祿前赴安徽宿州一帶官兵急回豫省以資堵禦奏  
入

上諭曰能如是固守甚好各路援兵陸續可到著固守  
以待之

沈兆澧林揚祖又奏言前漕督周天爵侍郎呂  
賢基聞帶領兵勇駐紮宿州一帶此時賊匪已

由歸德西竄開封睢州杞縣陳留等處道路梗塞文報難通不知周天爵等現紮何處可否仰乞

特旨迅飭該侍郎等帶兵數千或由永城入豫或由安

徽問道前來一面由臣等稟催撫臣繞道回省

合力攻剿保護省垣速圖克復歸德實爲兩便

奏入

上命軍機大臣傳諭周天爵曰前已疊次諭令周天爵  
馳赴汴梁奮力救援本日據沈兆雲林揚祖奏省城  
防守情形等語十三十四兩日賊匪於城東南兩面  
施放槍礮並有股匪從東而來不計其數官兵雖小  
有撿斬該匪退至繁塔寺屯紮又有竄赴朱仙鎮之  
信非外援迅速趕到與城內防兵協力夾攻難解倒  
懸之厄周天爵不能於亳州一帶攔賊北竄致令直



撲汴梁遲誤已難辭咎若再遷延不進於心何安該  
侍郎卽星夜兼程赴援與恩華托明阿善祿陸應穀  
等急籌解圍毋再遲延

上又命軍機大臣傳諭恩華曰本日已寄諭恩華等帶  
兵赴汴剿賊頃復據沈兆澣林揚祖奏賊匪圍攻汴  
梁甚急仍固守待援已諭令周天爵趕緊赴援惟賊  
匪梗阻東面恐周天爵援兵中途遇賊或有阻滯該

尙書已由曹河南渡距汴梁省城更爲近便著卽星速前往援救萬勿遲延乘賊匪勢尙散渙且被我兵擊退之時援兵趕到定可以痛加剿洗一切機宜應如何急籌妥辦之處不必再行請旨轉致貽誤

二十日 甲子 琦善慧成陳金綬奏言 臣等因勝保

於本月十二日帶領兵勇由天長迎剿竄賊恐揚城賊匪乘我移兵倥偬之時突出潛襲因於

十二日臣琦善攻打北面諭令德興阿等嚴防  
南門陸路臣陳金綬攻打西面臣慧成攻打東  
面十三十四等日接續會攻該匪因連日攻城  
緊急在南門河東搭架浮橋將西門大礮移併  
南門城上並於南面城垛添設槍礮臣等亦飭  
弁兵將水湖浮橋拆毀便益舊南兩門屢有賊  
匪潛出均被官兵迎擊仍潰入城廣儲門竄出

賊數較多雙來聞信趕往督同擊斃數十人招  
出民人陶淦等四名訊據供稱前日炸子打入  
城內擊斃廣西賊目三名湖南賊目五名賊衆  
甚懼湖南賊目計在死守臣琦善因該逆等既  
有畏懼之心必無堅守之志因用反間法繕寫  
告示多張諭令如能獻獲賊目來營不但免罪  
並與奏請賞給官職隱約其詞用火箭射入城

中使逆賊死黨見之互相猜疑此連日會攻揚城之情形也昨據派防浦口武慶開隆阿等呈稱五月初八日三更時分在金堂門外巡哨見江面有賊船四五十隻正在查看間忽從蘆葦中出有賊匪二三十人鳴鑼喊叫經武慶等奮力攻擊賊匪落河淹斃復在蘆葦中搜獲二十餘人當卽殺斃燒燬賊船十餘隻奪獲賊匪大

船一隻臣查該逆由浦口續竄接應皖省股匪  
本在意中現經武慶等擊退可見官兵但能奮  
勇直前逆賊卽行敗退頃又據淮徐道王夢齡  
稟稱賊匪初六日自亳州分竄歸德初七日午  
刻歸德失守准周天爵咨稱已帶兵赴歸德救  
援此外托明阿奕經善祿等未知行抵何處臣  
刻已飛咨托明阿等迅速帶兵前赴河南合力

堵勦又函商恩華等酌量情形將徐州清江兩路並顧現在賊匪竄至歸德距揚州較遠設向開封竄擾則衛輝爲扼要之地須調北來重兵防守更有蘭儀渡河徑至考城曹縣一路臣琦善已飛咨勝保就近相機辦理免致往返札商有誤事機奏入

上命軍機大臣傳諭琦善陳金綬雷以誠曰前因揚城

日久相持疊經降旨令該大臣及早克復並有旨令於季夏以前全行埽滅茲據奏稱連日會攻揚城情形雖經獲勝總未得手逆匪窮而思竄若能嚴防水陸竄路並用反閒解散黨與自可計日克復該大臣既知官兵奮勇直前逆賊卽行敗退正當乘此激勵將弁兵丁一鼓作氣若再遷延試問貽誤之罪將誰屬耶前有旨令慧成帶兵折回河北將雷以誠畀以



三  
幫辦軍務重任著琦善陳金綬與雷以誠會同迅速  
攻剿毋再觀望現在汴梁被圍待援孔亟已諭令恩  
華托明阿善祿等前往協剿如早復揚城賊匪聞風  
膽落分兵會擊不難迅掃妖氛也北省軍營熟悉賊  
情者甚少著琦善於所帶將弁並直隸弁兵中各揀  
數人迅飭前赴直隸交訥爾經額差遣

同日署理河東河道總督長臻奏言 臣前悉賊

匪北渡已飭將各口渡船拘集北岸嚴飭道廳  
實力防守旋於十一二日接兗州糧臺司道會  
稟賊匪已有搶船撲過北岸之勢劉家口距曹  
縣六十里距鉅野一百二十里處處兵單請速  
調弁兵前往堵剿臣查東省爲直隸屏障濟城  
又爲省垣藩籬距曹縣僅二百數十里設有疏  
虞所關匪細但本省各營弁兵節次徵調空虛

河標額兵除調赴江北防剿外其餘分派水陸  
衝衢及在城防守尙屬不敷該州縣雖各團練  
鄉勇爲數無多未能攔豕突狼奔之衆必須移  
緩就急趕截客兵以冀保全大局現據兗州糧  
臺司道稟明將已到滋陽縣之大同官兵五百  
名咨交曹州鎮臣帶赴曹單沿河防堵現在尙  
書恩華統帶

盛京吉林黑龍江官兵由德州改走水路陸續抵  
濟應請暫行截留二千名於西南一帶分布要  
隘迎頭剿擊洵於東直兩省均有裨益奏入

上命軍機大臣傳諭長臻李德曰據長臻奏賊氛逼近  
黃河北岸請截留恩華所帶官兵分布堵剿現因汴  
梁待援情形緊急已降旨催令恩華迅往援剿計此  
時已出東境未便截留著該河督該撫等體察機宜

應如何就近籌調兵勇嚴密設防之處隨時知照妥辦尤當扼守黃河各渡口勿令賊匪偷越

同日周天爵奏言臣於五月十一日追賊至河南永城縣十三日接據署江南徐州道王夢齡稟稱賊匪攻陷歸德府後又分股至劉家口一帶搜搶船隻意圖東下徐城距該處三百餘里黃河一水可通卽西南蕭碭兩縣陸路處處可

以分竄請將舉人臧紆青所募壯勇一千五百  
名飭令星夜管帶來徐協同防守並請酌派勁  
兵前往永碭宿交界之處扼剿以爲徐州上游  
聲援查宿徐一路西赴潼關北達兗濟必得重  
兵駐守臣惟馳抵碭山黃河南岸專守中路就  
近與呂賢基奕經等會商防剿奏入

上命軍機大臣傳諭周天爵曰自賊匪由皖入汴節次

諭催周天爵赴援朕意該侍郎前經行抵永城定已兼程前進茲據奏請扼守宿徐黃河以固中路該侍郎奉命勦辦賊匪布置經時總未離宿州近處以致賊匪自滁至亳直入豫省未聞督率兵勇與賊接仗今大梁危急而該侍郎折赴陽山欲其援救汴城已屬無及旣據奏稱徐州水陸各路形勢均爲緊要卽著該侍郎扼守徐州妥爲布置沿河要隘督飭嚴查

儻有賊匪偷渡惟周天爵是問徐州糧臺現已移往宿遷該縣係臧紆青原籍著卽飭令帶同練勇守護糧臺並嚴緝土匪毋稍疏虞

同日陳啟邁奏言據蕭陽二縣探報賊衆分股至劉家口屯踞搶奪商船意圖分竄查劉家口爲豫東各省商船雲集之所距歸德四十餘里徐州居其下游水程不過三百餘里各路糧臺



萃集一處深慮匪衆聞風窺伺當此黃河大汛  
輕舟急溜不難朝發夕至雖徐城兵勇現有三  
千餘名以之分扼水陸尙覺單薄糧臺關繫緊  
要不敢不加意慎重當與徐州鎮臣百勝徐州  
道王夢齡熟商稟請尙書恩華侍郎奕經撥兵  
來徐以杜北竄一面將軍火糧餉遵照疊奉

兩旨相機保衛於十四日移紮宿遷該處在徐城下二

百五十里雖同一濱臨黃河相離較遠且河南糧臺亦經藩司鄭敦謹同時移紮宿遷該逆知徐城無可覬覦或者不復東下惟宿遷存兵不多山東撫臣李德昨因曹州告急折回東省將派赴王營防堵之山西官兵五百名僅留宿二百名其餘三百名仍飭赴王營駐紮現在糧臺旣移宿遷自應一併截留再擬添募壯勇以資

保衛奏八

上命軍機大臣傳諭陳啟邁鄭敦謹曰賊匪紛竄皖豫距徐州較近糧臺自應移設著准其移往宿遷相機保衛仍著隨時偵探賊情嚴查土匪徐州兵力較單臧紆青籍隸宿遷已諭周天爵飭令該舉人帶領練勇協同官兵守護糧臺矣陳啟邁係承辦慧成恩華等北路官兵糧餉茲慧成已赴河北迎勦恩華赴汴

應如何分派糧臺各員源源接濟之處卽著陳啟邁會同鄭敦謹妥籌辦理現在鄭敦謹所辦琦善軍營糧臺亦同移至宿遷儻日後情形不同仍著該藩司等妥籌擇地布置

同日

上命軍機大臣傳諭陸應穀沈兆澐林揚祖曰昨據沈兆澐林揚祖奏省城防守情形並請飭催援兵已諭

恩華等星夜前進赴援矣該紳民等志切同仇協力  
固守甚屬可嘉現在攻撲汴梁之賊尙非大股經我  
守城兵民連日焚殺卽不敢偪城屯紮果能堅守以  
待援兵當不致有意外之虞現在托明阿善祿計已  
抵汴恩華亦由曹州南下計日當亦到汴勝保早經  
起程由皖赴豫指日大兵雲集定可保此危城著沈  
兆澐等傳旨曉諭該合城文武紳民人等如能始終

不懈保守危城必當破格施恩以酬勞績並著沈兆  
澧等將尤爲出力官兵士民先行酌賞軍功項翎以  
作士氣至賊匪藏匿民房及繞道遠行難保非別有  
奸計或係潛用地雷或係偷挖隄岸皆須密爲偵探  
加意防範黃河北岸已飭長臻李億撥兵嚴防陸應  
穀此時是否到省所調之兵共有若干鄆陵迪北有  
無梗阻總須內外夾擊勿徒株守並密探賊中動靜

嚴察城內奸細廣爲曉諭以定人心